

«Sistem electoral cunterfa a la constituziun»

Il comité d'iniziativa «Proporz 2014» insista sin ina midada immediata dal sistem electoral per las elecziuns dal cussegl grond

DA MARTIN CABALZAR

■ **Las elecziuns dal cussegl grond duain succeder da nov tenor il sistem da proporz e quai gia davent da l'onn 2014. Quai pretenda l'iniziativa d'in comité independent che consista d'ina coaliziun tranter la dretga (pps) e la sanestra (ps, verds e verd-liberals).** A la conferenza da medias dad ier a Cuir a ha l'advocat *Andrea Bianchi* preschentà in pareri giuridic da *Andrea Töndury* che vegn cleramain a la conclusiun ch'il sistem electoral actual per las elecziuns dal cussegl grond na correspunda betg a las premissas giuridicas ch'in sistem electoral stoppia ademplir. Per garantir ina represchentanza gist dal pievel en il parlament saja ina sperta midada dal sistem electoral necessaria. Tenor l'avis dals iniziants sto l'introducziun dal proporz vegnir realisada stringentamain sin las proximas elecziuns da parlament da l'onn 2014. Tenor Bianchi èsi inacceptabel che la cumposiziun dal parlament chantunal na correspunda betg als principis francads en la constituziun.

In sistem antiquà ed illegal

Il pareri da *Andrea Töndury* vegn a la clara conclusiun che il sistem electoral actual cunterfa a la constituziun federala sco quai che pliras sentenzias dal tribunal federal documenteschian. La gronda part dals circuls electorals sajan circuls cun pliras personas en elecziun, quai che portia dischavantatgs per las partidas pitschnas e minoritaras. La garanzia che scadin cumin ha almain in deputà independentamain dal dumber da sia populaziun è zunt arbitrar e na correspunda betg a l'egualità da las vuschs che è stipulada en la constituziun federala. Il principi da maiorz en l'emprim scrutini sutmeneschia il principi da la maiorità damai ch'el lubeschia ad ina minorità da la populaziun da con-



Suenter che l'emprema iniziativa da proporz da la pps è vegnida declarada per nunvalaivla han in comité sur las partidas inoltrau in secunda iniziativa sut il tetel «Proporz 2014»

FOTO M. HARTMANN

tonscher la maiorità en il cussegl grond e seigi aschia pauc democratics. Il sistem actual seigi in relict dil 19avel tschentaner che risguardi buca il svilup tecnic ed electoral dils ultims 150 onns.

En consequenza da quei sistem malgist sco el vegnia praticaus en il Grischun disponian las minoritads politicas d'ina maiorità parlamentara, punctescha Bianchi. Ed el illustrescha quai cun il fatg che la pcd e pld hajan contonschì ensemen mo 28,53% da las vuschs tar las ultimas elecziuns dal cussegl naziunal, sajan dentant represchentadas en il cussegl grond cun prest 60% dals mandats.

Proporz ni maiorz?

L'expert giuridic *Andrea Töndury* vegn alla conclusiun che ton il maiorz sco il proporz èn pussaivels tar las elecziuns dal parlament. En in medem mument punctescha el dentant era che il sistem electoral saja conform a la constituziun mo sche ils circuls electorals fissan tuttina gronds. Damai che quai saja strusch pussaivel en il Grischun na possia il sistem da maiorz betg garantir ina cumposiziun represchantativa e proporziunala di parlament. Per quest motiv hajan era praticamain tut ils chantuns tschernì il sistem da proporz per las elecziuns da lur parlaments.

Torpedà ina midada necessaria

Sco quai che *Anita Mazzetta* sincerescha haja il parlament federal gia crititgà il sistem electoral grischun tar l'aprobaziun da la constituziun grischuna. Ins haja dentant renunzià d'intervegnir quintond che il chantun curregia da sez anor questa muncanza. Quai na saja dentant betg capità e la regenza haja manchantà da preschentar ils ultims onns ina proposta duvrabla. Ella haja semplamain declarà l'iniziativa da la pps per nunvalaivla senza far atgnas propostas. La regenza haja dentant almain admiss che a mesa vista stoppia era il Grischun introducir il sistem da prop-

porz. Als iniziants hajan ins miss en vista che la revisiun dal sistem electoral succedia suenter che la refurma territoriala saja sut tetg.

Era tar l'iniziativa preschenta haja la regenza interprendi nagut per schliar il problem. Apparentamain veglian ins sclerir la dumanda fundamentala, renunzia dentant ina ulteriura giada da far propostas concretas, crititgescha *Anita Mazzetta*. Il comité d'iniziativa saja cleramain da l'avis che fin la votaziun davart l'aritelg constituziun stoppian era las leschas correspundentas esser sin maisa. En il cas ideal fissi stà cunvegnet da decider en il medem mument ton davart la midada da la constituziun sco davart la realisaziun legala da quella.

Co vinavant?

Sin fundament dals fatgs evidents quenta deputà *Andrea Davaz* che regenza e cussegl grond fetschian tut il pussaivel per che las finamiras da l'iniziativa possian vegnir realisadas fin mez da l'onn 2013 uschia che las proximas elecziuns dal parlament pudesian vegnir exequidas tenor il nov sistem. Tenor *Davaz* saja quai absoluta-ment pussaivel sch'ins instradeschia immediat las preparativas necessarias. Quai saja la suletta via democratica per garantir in sistem electoral che correspundia alla constituziun. Cass cuntrarì existia il privel che la midada dal sistem electoral vegnia tuttina la finala acquista sin via giudiziala sur las dretgiras. Il comité deplorassia dentant sche las autoritads politicas n'agiessian betg cun senn da respunsabilitad sin fundament da la situaziun giuridica fitg clera, manaja *Davaz* concludend. Ina retratga da l'iniziativa na saja en scadin cass betg prevedida, nun ch'il cussegl grond saja prompt d'acceptar tut las pretensiuns dals iniziants.